



Universitätsbibliothek Paderborn

Ioannis S. R. E. Cardinalis Bona Opera Omnia

Tribus Tomis comprehensa

Opuscula Spiritalia - I. Horologium Asceticum. II. Principia Vitae Christianae. III. Manuductio ad Coelum. IV. Via Compendii ad Deum. V. De Sacrificio Missae. VI. De Discretione Spirituum ... Operum Eminentiss. Cardinalis, Tom. I

Bona, Giovanni

Parisiis, 1677

§. 8. Specialis oblatio sacrificii quatenus est latreuticum

urn:nbn:de:hbz:466:1-9969

§. VIII. *Specialis oblatio sacrificii quatenus est
Latreuticum.*

Sancta Trinitas unus Deus, rerum omnium principium & finis, cuius potentia, sapientia, bonitas, & magnitudo incomprehensibilis est, toto corde & corpore prostratus adoro te; tibique hodie sacrificium offerre intendo corporis & sanguinis Domini mei Jesu Christi, pure propter te, ad maiorem tui gloriam, in protestationem supremi dominii tui in omnes creaturas, & nostrae subjectionis ac omnimodae dependentiae a te: in recognitionem infinitae tuae perfectionis, beatitudinis, & glorie, omniumque operum tuorum, quae sumnoperè gaudeo a nulla creatura dignè posse aestimari, nisi a te Pater omnipotens, aeternæ Deus, & ab Unigenito tuo Salvatore nostro, qui tecum, & cum Spiritu sancto unus est Deus, unus est Dominus: quem ideo tibi in sacrificium laudis offero tua infinita maiestate dignissimum, in cultum latriæ tibi soli debitum, cum omnibus obsequiis, laudibus & adorationibus, quibus te olim glorificavit in terris: una cum meritis, laudibus, & adorationibus beatissimæ Virginis Mariæ, omniumque Angelorum, & Sanctorum. Quis enim ego sum vermiculus terræ, & opprobrium hominum, ut audeam faciem meam levare ad te, & aspicere altitudinem cœli? Christi igitur Filii tui, & omnium electorum meritis onustus accedo ad te, eorumque nomine & affectu abjicio me corpore & spiritu ante thronum Divinitatis tuæ, ut intelligat universus orbis me esse opus manuum tuarum, & tanquam nihil ante te. O quam gratum & jucundum mihi foret per omnes undique regiones omnes homines videre in genua provolutos te adorare: Sed quia plerique te non cognoscunt, vel cognitum non venerantur, pro his quoque te adoro, teque humiliè deprecor, ut hanc oblationem Filii tui suscipere digneris in supplementum peccatorum & blasphemiarum, quibus perditæ mortales te offendunt sive in terra, sive in inferno. Tibi gloria in sæcula. Amen.